

Asasara Præsidenti.

Nunat Avannarliit Siunnersuisoqatigiivini pingaarutilimmik oqaloqatigiinnermi peqataanissamut qaaqqusissummut qujanaq. Susassaqarfinni assigiinngitsuni ataatsimoortitsinnermut tunngatillugu suleqatigiinnerunikkut Nunani Avannarlerni immitsinnut qanoq nakussatsissinnaasugut eqqartugassatta ilagaat.

Ataatsimiinnermi matumani inuit isumaannik paasiniaanermi nutaanerpaami paasisat saqqummiunneqarput, matumanilu maluginiarpara qujanartumik innuttaasut Nunani Avannarlerni imminnut tatiginertik oqaatigisimagaat.

Ullumikkut oqaaseq tatiginnineq aamma Nunat Avannarliit Siunnersuisoqatigiivisa oqallinnermi atorpaat. Tamatumangga paasivara nunani avannarlerni suleqatigiinneq tatigeqatigiinnermik tunngaveqartut Siunnersuisoqatigiinnit isigineqartoq, tassa malittarisassat maliinnarlugit suleqatigiinnertut, naggataatigut isumaqatigiinngissutit eqqartuussivimmi aalajangerneqartussatut, isiginngikkaat.

Nunatsinni aamma ataatsimoortitsineq sulissutigivarput – Nunani Avannarlerniinnaanngitsoq kisianni aamma nunani tamalaani. Namminersorlutik Oqartussat tigussaasunngortinnissaat sulissutigivarput, taamaaliorumallutalu akisussaaffiit annerusut tigusariaqarpavut, soorlu nunat tamalaat akornanni isumaqatigiissutit ilaaffigisatta eqqortinnerisigut. Ilaatigut isumaginninnerup tungaatigut inuit pisinnaatitaaffiisa suli annerusumik eqqortinnissaat inatsisitsinni qulakkeerniartarparput. Taamaaliortarpugut nunat allat FN-imut ilaasortaasut pisarnerattut. Taamaalilluta namminiilivinnissaq pillugu sulinitinni alloriarnissamut tulliuttumut piareersartarpugut.

Nunani Avannarlerni ataatsimoortitsineq aamma nammineq nunatsinni ataatsimoortitsineq ataasioqatigiilissutigisarpavut. Nunatsinni ikinnerussuteqartut pisinnaatitaaffii aamma suliffeqarnissamut, kultureqarnissamut demokratiimullu peqataanissamut periarfissat - inuiaqatigiittut inuunitsinnut peqataasut - assigiinnissaat illersortarpavut.

Nunani Avannarlerni annerusumik ataatsimoortitsineq assigiinngitsutigut, ajortup tungaanut ingerlasunut tunngatillugu, uatsinnut pisussaaffiliivoq. Imartatsinni plastikkit assigiinngitsut avatangiisitsinnik navianartorsiortitsipput. Nalunngilara ministerit siunnersuisoqatigiivisa arlallit ajornartorsiut tamanna sulissutigigaat. Tamatumunnga tunngatillugu nunani avannarlerni

ataatsimoortitsisutut iliuuseqarsinnaanerput ersersissavarput. Nunagisatta akornanni, aammali nunat tamalaat akornanni.

Kalaallit Nunaata tungaaniit maluginiarpara Nunat Avannarliit Siunnersuisoqatigiivini saamit Nunat Avannarliit Siunnersuisoqatigiivini sinniisoqarnissaat suli qulakkeerneqarsimanngitsoq. Saamit inatsisartui suli avataaniipput, qularinngilaralu suliامي tamatumani aaqqiissutip naammagisimaanartup Nunani Avannarlerni ataatsimoortitsineq nakussatsissagaa. Taamaalilluni aamma nunani avannarlerni inuiaqatigiit tamarmik nunani avannarlerni akuliutitinneqartarnerannik ileqqoqarnerput ersersissavarput.

Nunani avannarlerni suleqatigiinnerup tatigeqatigiinnermik tunngaveqarnera pissutigalugu malittarisassat malillugit, inatsisilerituut annertuumik misissueqqissaarnerannik tunuliaqutaqarluni pilersinneqartartut, pinnagit amerlanertigut pissutsit piviusut tunngavigalugit aaqqiissutissarsiortoqartarpoq.

Kalaallit Nunaata tungaaniit kaammattuutigiinnarsinnaavara oqaloqatigiinnitsinni sameting-it pingasut akuutikkumallugit Nunat Avannarliit Siunnersuisoqatigiivi siulliullutik iliuuseqassasut.

Imminut napatittumik ineriartortitsineq pillugu FN-ip nunanut tamalaanut anguniagaasa malittarinissaannik nunat avannarliit suliaat tatigeqatigiinnitsinnik tunngaveqarpoq, tamatumalu saniatigut nunatsinni sulinitsinnut isumassarsiorfiuvoq.

Kisianni aamma eqqumaffigisariaqarparput nunat killeqarfiinik qajannarsaaneq FN-ip anguniagaanut ataatsimut arlalinnulluunniit piviusunngortitsiniarnermut ajortumik sunniuteqarsinnaammat. Assersuutigalugu sulisartut killilersugaanatik nuuttarsinnaanissaannut tunngatillugu.

Nunatsinni aaqqissuusseqqinnerit, nunatta periutsinik nunani avannarlerni atugarissaartitsinermut atorneqartartunik nunami issittumi atuiniarnerani qulakkeerinittussat, suliarineranni FN-ip 2030-mut anguniagai atorsinnaavavut. Taamaaliornitsigut imminut napatittumik ineriartortitseqataasinnaavugut.

Nunani Avannarlerni inuit isumaannik paasinniaanermi, siusinnerusukkut eqqaasanni, aamma maluginiarpara nunanut tamalaanut kiinnertarnitsinni nunaqqatikka angutit arnallu oqartut Nunani Avannarlerni ataatsimoortariaqartugut, taamaalillutalu sunniuteqarluarnerulluta.

FN-imi nunat avannarliit ileqqoraarput naligiissitaanermut tunngatillugu taamaaliortarluta, amerlanerusunulli, pingaartumik EU-mut, tunngatillugu taamaaliornerusariaqarpugut.

EU-mut tunngatillugu malitassaliornermi peqqussutiliornermilu nunani avannarlerni aaqqiissutit EU-mi aaqqiissutaanerulernissaat nunani avannarlerni ataatsimoortitsinermit nakussatitsinermit anguniakkatta ilagisariaqarpaat.

Nunani avannarlerni aaqqiissutit siunissami europami aaqqiissutaalerpata taava aamma nunat killeqarfiinik qajannarsaanerit nutaat pilernissaat pinngitsoortissavarput. Uagutsinnut, EU-mut EU-milu aningaasaqarnikkut suleqatigiinnermut ilaanngitsunut, tamanna pingaaruteqartorujussuuvoq, tassami suleqatigiinnermit peqataaffigisimasatsinnit avissaartinneqaratarsinnaagatta.

Asasara Præsidenti

Kalaallit Nunaata nunani avannarlerni suleqatigiinneq assut pingaartippaa. Nunap sanilitta qaninnerpaap attaveqaaqatigisarnera pissutiginnarnagu kisianni aamma ukiuni aggersuni inuiaqatigiinni naleqartitavut nunat tamalaat akornanni suleqatigiinnermut sunniuteqassappata nunarsuarmi minnerunngitsumillu Europami allanngornerit takusavut pissutigalugit nunat avannarliit ataatsimoornerulernissaat pingaaruteqarmat.